
MAYESTRE PEIRE DE CORBIAN o CORBIAC

2701.

DOMNA des angels regina ,
Esperansa dels crezens ,
Segon que m comanda sens
Cant de vos lenga Romana ;
Quar nuls hom just ni pecaire
De vos lauzar no s deu taire ,
Com sos sens meils l'aparelha
Romans o lenga latina.

Domna , roza ses espina
Sobre totas flors olens ,
Verga seca frug fazens ,
Terra que ses labor grana ,
Estela del solelh maire ,
Noirissa del vostre paire ,
Èl mon nulla nous somelha
Ni londana ni vezina.

Domna , joves enfantina
Fos à dieu obediens
En totz sos comandaments.
Per que la gent crestiana
Cre ver e sab tot lo faire
Queus dis l'angel saludaire ,
Quan receubes per l'aurelha
Dieus , quez efantes vergina.

Domna , verges pur' e fina
Ans que fos l'enfantamens
Et apres tot eissamens ,
De vos trais sa carn humana
Jhesu-Christ nostre salvaire ;
Si com ses trencamens faire
Intra'l bel rais quan soielha
Per la fenestra veirina.

Domna , vos etz l'aigentina
Que trobet vert Moysens ,
Entre las flamas ardens ;
E la toison de la lana
Que mulhet dins la sec' aire ,
Don Gedeons fon proaire :
E natura s meravelha .
Com remazest enterina.

Domna , estela marina
De las autras plus luzens ,
La mar nos combat e'l vens ,
Mostra nos via certana.
Quar sins vols à bon port traire ,
Non tem nau ni gouvernaire ,
Ni tempest quens disturbelha ,
Ni'l sobern de la marina.

Domna , metges e metzina ,
Lectoaris et enguens
Los nafratz de mort guirens ,
La vilheje onh e saná.
Dossa , pia , de bon aire ,
Vós me fatz de mal estraire ;
Quar perduz es qui sonelha ,
Que la mort l'es trop vezina.

Domn' espoza , filh' e maire ,
Manda'l filh e prega'l paire ,
Ab l'espos parl' e cosselha
Com merces nos si' aizina.

Pos dormen mas tuns esvelha
Ans quens sia mortz vezina.